

四庫全書

史部

欽定四庫全書

史部

欽定盛京通志卷

七十九至
八十

少詹事_臣曹城覆勘

總校官編修_臣朱

鈐

欽定四庫全書

欽定盛京通志卷七十九

國朝人物十五

鑲白旗漢軍

鑲紅旗漢軍

欽定四庫全書

欽定盛京通志卷七十九

國朝人物

十五

鑲白旗漢軍

王元忠隸鑲白旗漢軍原守鳳凰城堡天命六年
鎮江中軍叛降毛文龍元忠獨來歸授佐領世職
後明降將內有與明通謀者元忠發其謀擒斬之
又追殺逃叛生擒哨卒二次天聰八年以戰功授

叅領加世職二等順治七年九年兩遇

恩詔加世職三等男

尚好仁奉天人隸鑲白旗漢軍崇德五年我軍圍
錦州好仁擊松山明兵敗其衆七年復圍錦州功
居一等尋管佐領事八年從征明中後所前屯衛
皆有功順治初加世職三等輕車都尉官浙江溫
州鎮總兵卒祭葬如禮

呂應學奉天人隸鑲白旗漢軍父國寶隨耿仲明

航海歸誠應學於崇德六年授二等副都統世職
八年從征明攻中後所前屯衛督巨礮克之順治
元年從入關六年從征廣東斬偽總兵楊杰周齊
王啟科等大捷敗偽伯馬養麟之衆於靈山擊偽
晉王李定國兵于高明新會連敗其黨十四年叙
功授三等子

高國相廣寧人隸鑲白旗漢軍父中選明乞休遊
擊天聰八年國相隨父來歸初任佐領崇德八年

從克中後所前屯衛順治元年隨入關二年西征
至陝西克延安追流寇至湖廣並有功六年隨征
山西叛鎮姜瓖克大同朔汾等處累加世職一等
輕車都尉十二年征海賊鄭成功有功十六年駐
防京口康熙十三年吳三桂等叛隨征江南徽州
等處賊寇屢有功又破吳三桂叛衆於武崗州楓
木嶺等處十九年任杭州副都統致仕卒

賜祭葬

馮有功奉天人隸鑲白旗漢軍官佐領身歷戎行
崇德八年從征明中後所前屯衛克之順治元年
隨平山西追敗流賊于湖廣武昌獲戰船七年九
年兩遇

恩詔加三等輕車都尉世職子國相康熙中從征厄魯特
噶爾丹有功官至都統雍正十年入祀賢良祠

朱延禧奉天人隸鑲白旗漢軍父世勲天命七年
來歸延禧授輕車都尉世職順治元年隨入關同

征叛鎮姜瓖克復澤潞等處叙功累加至三等男
十一年隨征廣東偽晉王李定國擢副都統十六
年駐防福建康熙中卒

賜祭葬如典禮

蔣國柱奉天人隸鑲白旗漢軍順治四年授都察
院啟心郎十一年擢工部右侍郎十三年調戶部
左侍郎十八年以副都御史巡撫山東自明季重
斂之餘糧有包荒役有雜派國柱一切奏除之民

因以蘇康熙三年調浙江巡撫疏陳浙江寧台溫諸郡荒田招墾起科事宜及分別蠲免被水田畝額賦俱有經畫悉心民瘼茂著勤勞卒于官

賜祭葬如例

白秉貞錦州人隸鑲白旗漢軍順治四年任湖廣黃州府同知斷事明決一郡質訟之事咸願歸之東山盜起總督羅綉錦委秉貞率民兵攻之秉貞詳請勦撫兼施凡四閱月四十八砦悉定康熙六

年累陞直隸河南山東總督所至多惠政卒祀湖廣名宦

朱昌祚遼東人隸鑲白旗漢軍順治十八年授浙江巡撫會浙東西災旱昌祚捐金煮粥以活饑民時海氛未靖並疏請酌撥荒田令瀕海居民遷移內地者開墾康熙三年擢福建總督尋以憂去四年起復總督直隸山東河南等三省昌祚秉性忠耿端已率屬嚴飭將士兵民戢和遇事執法無所

偏徇輔臣鰲拜以鑲黃旗正白旗分地瘠薄遣部臣會同督撫重易善地他旗多不樂從民地被圈咸泣訴失業昌祚上疏極陳其弊鰲拜怒坐以撓法罪立絞死旗民哀之八年

聖祖追復原官予祭葬謚勤愍

王宗聖奉天人隸正白旗漢軍順治中知江南之舒城令詳慎明決吏不敢欺而獄無枉縱案無積滯邑當兵燹後安輯流亡惠威並著吏民咸深感

戴卒祀本邑名宦

王國泰蓋平人隸鑲白旗漢軍康熙十二年為福建福州府同知值逆藩耿精忠潛蓄異謀國泰偵知其陰事每達於總督范承謨有先事預防之智後佐郡泉州與民休息遷本省驛傳道會耿精忠甫平海氛尚熾軍興旁午辦應夫船親自給價毫不擾民未幾泉州告警自請召募壯勇得數千人授以衣糧甲仗身先士卒奮呼擊賊賊遂大潰泉

州園解叙功增秩擢安徽按察使閩人思之祀名

宦祠

蔣毓英奉天人隸鑲白旗漢軍初任浙江温州府
同知時海氛未靖大軍駐衢征勦毓英悉心籌畫
輸運糧餉仍加意撫綏嚴行保甲闔郡帖然康熙
二十二年初平臺灣調毓英為知府毓英履任躬
歷郊原披斬荆棘經界三縣封域相土定賦罷不
急之役安撫番夷招集哀鴻臺地遂為樂土二十

九年擢江西按察使時江湖多盜剽劫商旅毓英
檄令各州縣查明船戶編立字號各給用印腰牌
飭令未晚停泊守汛兵目以五船為一伍十船為
一甲輪流支更守宿天明放行由是羣盜屏迹其
讞獄必以情常親理囹圄寒冬酌給棉衣尋擢浙
江布政使將赴任衆囚聞之感泣數日後卒四十
六年入祀臺灣江西名宦

李德耀奉天人隸鑲白旗漢軍康熙四年知四川

大邑縣自處節儉為政簡約嘗單騎遍閱郊原度地開渠導水俾民田悉資灌溉闔邑獲豐登之利蜀地故多先賢祠墓公暇尤加意葺修古蹟不至湮沒民思其惠久而不忘五十年入祀名宦

白登明蓋平人隸鑲白旗漢軍知江南太倉州立衙蠹地棍賭博奸淫四禁犯者必置之法境內肅然奸民某通寇事覺總督檄州捕之某袖出一狀某某皆其黨凡州中巨室富家無或遺登明知其

誣笑曰若欲生乎死乎對曰欲生登明曰若非寇
何知某某皆寇黨以若狀上死無赦矣某感悟遂
燬其狀登明代為申辨州之大姓皆獲免公暇試
諸生以地方利弊纖悉畢陳故摘發無不中鄰邑
有冤抑者訴諸上官願下州為理州田阜高常賴
灌溉自劉河堙塞苦潦登明乃先濬朱涇後及劉
河凡六十里州及崑嘉二邑咸賴其利
白允明登明仲弟以選貢得官慨然曰

國家肇基東土從入關者多以武功翼運今天下雖
大定然西南尚有逋寇依託明藩竊據雲貴侵擾
川湖兩廣兵革不息正志士効命之秋也乃習韜
鈴精武事順治十二年以薦授雲騎尉十六年隨
擊偽都督楊文英等於揚子江口大捷康熙十三
年逆藩吳三桂等叛海寇亦乘機窺伺江南以將
軍王之鼎薦屢擢都督僉事守崇明二十五年三
藩平改駐防廣東叅領卒祀江南名宦

白啟明登明季弟康熙二十一年知粵之慶遠府
時初經兵燹田畝蒿萊啟明竭力撫循收贖男婦
之被掠者勸民墾闢設義倉以濟貧乏給牛種以
資耕植境內饒裕復以時修舉廢墜建學宮葺城
垣皆捐俸成之嗣以循卓遷擢去五十七年入祀
粵西名宦

董守義奉天人隸鑲白旗漢軍康熙中知江南舒
城縣有幹濟才當逆藩吳三桂耿精忠之亂大軍

往來繹絡舟車芻糗應時而辦閭閻安堵秋毫不
擾康熙二十三年擢任四川達州牧在任期年有
亮人手賊叔母詭以盜殺訴於州守義廉得實情
立摘其奸遂引伏寘諸法州人以為神卒祀達州
名宦

佟國瓏奉天人隸鑲白旗漢軍康熙五十一年任
山西澤州守政尚寬和與民相安凡州縣營建無
不修舉在任八載輿衆歡洽其始莅任踰年以星

誤去州民攀留合詞上請復得留任及卒入祀名宦

胡國佐遼陽人隸鑲白旗漢軍知河南歸德府值歲荒設法賑濟全活至數十萬人民懷其德其所立救荒諸政皆有經濟卒祀河南名宦

鑲紅旗漢軍

金礪遼東人隸鑲紅旗漢軍

太祖天命七年來歸授三等男天聰五年為兵部承政

太宗章演武場閱兵礪與叅領石國柱金玉和高鴻中等
並以訓練有方

賜鞍馬尋調戶部承政八年晉二等男崇德二年以大軍
征明皮島礪所部水師觀望不進革世職五年授
吏部叅政尋擢都統八年隨鄭親王濟爾哈朗攻
明前屯衛中後所二城以礪攻克之論功授三等
輕車都尉世職順治元年隨入關安撫天津亂民
尋同都統葉臣招撫山西賊黨陳永福踞太原礪

攻克其城晉二等輕車都尉三年隨順承郡王勒克德渾征湖廣偽總兵馬進忠降而復叛礪擊敗之武昌奪其戰艦六十時明桂王朱由柳聚屯湖南礪同平南王孔有德等征之四年礪等斬偽伯黃朝宣於衡州進兵長沙斬總兵楊國棟於牛皮灘晉世職一等輕車都尉六年授平南將軍鎮守浙江明魯王朱以海踞舟山礪進克其城並擒其偽蕩湖侯阮進九年海賊鄭森犯漳州礪由長泰

進營漳州城北分兵萬松關以牽制之賊來攻七
戰皆捷叙功又兩遇

恩詔晉爵一等男加一雲騎尉十一年授川陝總督十三
年乞休加太子太保康熙元年卒

賜祭葬如例

趙國祚漢軍鑲紅旗人父一鶴

太祖時來歸天聰八年授三等輕車都尉世職國祚其次
子也崇德四年以佐領屯田義州八年偕護軍統

領阿爾津征黑龍江師還得

恩賚從鄭親王濟爾哈朗攻克前屯衛中後所二城順治
元年授雲騎尉世職尋陞叅領從豫親王多鐸南
征取揚州從貝勒博洛移師定浙江師還克江陰
晉騎都尉八年授戶部理事官擢副都統再擢都
統屢遇

恩詔晉世職至二等輕車都尉十二年授平南將軍駐防
浙江十五年任浙江總督十六年海賊鄭成功犯

温州樂清諸縣國祚以兵禦之獲其船九十餘賊
退入舟山明年成功寇江南臨鎮江犯江寧大軍
擊敗之儀鳳門外乃遁入海追論疎防奪歲俸十
八年遷山東總督再遷山西康熙元年罷還京十
三年逆藩吳三桂反起為江西提督駐九江以遏
賊衝會逆藩耿精忠叛應三桂遣其黨陷廣信撫
州建昌國祚移駐南昌偕將軍希爾根哈勒哈齊
分道勦賊擊敗偽都督易明逐北七十餘里遂復

撫州易明復引賊萬餘來犯又擊敗之殲賊四千
有奇十四年大軍下福建精忠窮蹙降國祚遂專
勦三桂十五年從安親王兵樂進兵湖南駐長沙
屢戰却三桂兵十八年南抵寶慶破賊紫陽河再
破其將吳國貴兵二萬于雙井堡國貴中礮死蹙
其潰衆於武岡州復州城前國祚以力戰被創尋
創發乞休乃還京二十七年卒年八十

賜祭葬謚敏壯姪璉亦屢著有戰功卒謚襄勤

柯汝極遼陽人隸鑲紅旗漢軍天命六年克遼陽
有降人欲乘間叛汝極發其謀復擒獲間諜十四
人擢叅領授三等輕車都尉世職順治初歷官禮
部叅政鑲紅旗漢軍副都統累加世職至一等四
年以副都統駐防杭州七年卒於官無子以從子
永慕為嗣襲職永慕累官戶部侍郎擢漢軍都統
是時閩寇鄭成功假明桂王由榔年號竊發海上
遣偽伯阮思偽總制陳六御偽總兵胡自慶等犯

浙江之舟山陷之十三年永慕偕將軍伊勒德以
水師出蛟門擊賊衡水洋賊舟卻復前永慕躍入
其舟斬自慶餘賊轉帆遁追及之並斬思六御等
遂定舟山以功賜爵三等男康熙元年偕將軍濟
什哈勒山東賊于七於岨嵎山賊乘夜犯永慕營
射殪百二十餘人于七竄入海十年授京口將軍
尋罷十三年起山東提督二十四年卒

柯永盛汝極從子也崇德六年任佐領從圍錦州

攻克瞭馬山臺及杏山塔山城七年偕副都統馬
光輝監鑄神威礮八年從取前屯衛中後所二城
叙功授騎都尉世職順治元年任刑部理事官大
軍初定山東授膠州總兵官既至鎮勦昌樂土賊
秦尚行等平之流賊李自成裨將趙應元詭就侍
郎王鰲永招撫入青州害鰲永踞城作亂永盛聞
變偕副都統和托李率泰馳赴青州駐兵城外輕
騎入城計縛應元斬之復率兵圍高密擒斬偽元

帥張輿二年灘縣土賊張廣降而復叛擁其衆數千突犯萊州永盛遣遊擊楊遇明擊敗之廣中鏃死餘賊悉平三年移鎮江寧會勦江西叛賊南贛巡撫苗胙土以江西諸郡叛服不常請留永盛駐其地遂改南贛總兵官四年正月湖廣興國州土賊柯抱冲陳珩王等犯武昌殺同知張夢白寇掠江西武寧永盛遣將分勦連破賊砦抱冲珩王並就擒斬時明桂王朱由榔據湖廣石城寧都雩都

瑞金長寧安遠諸邑叛應之倚山結寨四出剽掠
永盛遣副將劉伯祿徐啟仁叅將董大用遊擊孔
國治等先後勦平之八月擢湖廣提督五年江西
總兵金聲桓叛興國孝感雲夢黃安麻城蘄州土
賊乘間蠢動永盛移兵扼要隘分遣叅將鄔乘鸞
遊擊張國忠等搜勦賊寨以次奏捷十年流賊張
獻忠遺黨李定國孫可望等附于由榔迎由榔至
安隆寇陷廣西出沒湖南我大將軍貝勒屯齊進

師衡州永盛督兵繼其後策應援勦屢敗賊晉世
職為三等輕車都尉十八年改山西提督康熙三
年加左都督七年加太子少保八年以老致仕十
四年卒

賜祭塋如例子鍵襲從弟永華屢積有軍功永昇于康熙
中殉難湖北

羅繡錦奉天人隸鑲紅旗漢軍天聰五年始設六
部繡錦由諸生授工部啟心郎八年

命禮部試滿洲漢人通文義者為舉人繡錦與選

賜衣一襲尋授國史院學士纂修

太祖實錄成得

恩賚崇德七年兼任佐領順治元年擢河南巡撫流賊李

自成黨時寇掠衛輝懷慶間原武新鄉諸邑復土

賊蠡起繡錦請發八旗勁旅剿之會豫親王多鐸

統師征陝西道出河南諸賊驚懼乞降或望風遁

去二年擢湖廣四川總督時湖南郡邑為明大學

士何騰蛟等所據自成遣其黨一隻虎劉二虎者復寇擾湖北繡錦至荊州檄兵防勦屢奏捷遣副將唐國臣總兵楊文富等分道討天門土賊于八百洲擒其渠胡公緒毀其巢四年恭順王孔有德督兵征湖南下長沙衡州寶慶辰州諸府繡錦議設鎮協駐守從之先是鄖陽總兵王光恩與鄖襄道李之綱以賊私互訐下撫按會核光恩罪寔逮下吏其弟光泰遂踞鄖陽叛提督孫定遼戰歿

世祖遣侍郎喀喀穆督師進勦繡錦以兵會之復鄖陽光
泰遁四川五年喀喀穆將班師而江西提兵金聲
桓叛于南昌遣其黨犯九江武昌自成遣黨郝搖
旗馬進忠降於騰蛟連陷常德武岡辰州沅州湖
南北騷動繡錦乞留喀喀穆駐荊州分遣提兵徐
勇馬蛟麟等防守要隘屢敗賊已而鄭親王濟爾
哈朗統師征湖南以次復所陷郡邑繡錦疏言湖
南叛服不常恐大軍凱旋餘孽復跳梁煽誘請分

寘諸降人于腹地

世祖嘉納其言九年卒于官六十有三

賜祭葬贈兵部尚書勒石紀功廕一子入監

劉武元錦州人隸鑲紅旗漢軍幼習韜畧天聰五
年來歸崇德初授刑部叅政順治九年從入關改
任叅領授三等輕車都尉世職三年巡撫南贛時
裨將二十餘人皆桀驁武元申明令甲嚴輯部伍
殘黎漸次安集四年勦平瑞金石城興國龍南寧

都上猶等土賊擒斬偽都督葉南芝等五年提督
金聲桓副將王得仁據南昌叛攻圍贛州武元與
提兵胡有陞堅守數月民無叛志會援兵至得仁
中創聲桓撤圍退走武元出奇師襲其後敗之於
太湖港時叛鎮李成棟自廣東擁衆來攻武元密
遣將出其不意擊之斬首萬計成棟遂潰分遣諸
將擊諸郡餘賊皆平之叙功

賜豐貂冠服鞍馬等物六年勦成棟餘黨於瑞金雩都崇

義等縣進敗賊於梅嶺七年分兵殲寧都賊彭順
慶大庾賊羅榮等叙功加太子太保兵部尚書三
遇

恩詔晉世職一等輕車都尉加一雲騎尉十一年卒

賜祭葬諡明靖贈少保長子瀆襲

李棲鳳廣寧人隸鑲紅旗漢軍為諸生時即以天
下為己任天聰時任內院副理事官崇德元年考
察各官棲鳳列二等順治二年補山東東昌道旋

調湖廣荊南道三年授湖廣布政使旋任安徽巡撫勦休寧婺源二縣土賊及宿松賊趙正等平之六年以僉都御史撫粵與平南王尚可喜靖南王耿繼茂先定南韶二郡揚帆直下遂定雷廉等處八年敗李定國于龍頂岡殲馘無筭棲鳳撫粵八年杜請託絕饋遺省刑薄歛勞來安集粵民賴之十五年加兵部尚書代李率泰總兵兩粵擒朱由榔偽將陳奇策等定太平思恩等府宣尉烏蠻土

司及交趾諸部悉讐服來貢十七年加太子少保
十八年設廣東西兩總督棲鳳改廣東尋予告歸
卒於家粵人思之祀名宦

賜祭葬如例

馬鳴珮隸鑲紅旗漢軍其先山東蓬萊人後占籍
遼陽及大軍克遼陽遂隸旗籍鳴珮年十七以文
學受知

太宗官工部啟心郎崇德八年以考滿稱職加世職順治

元年擢山西冀南道時潞汾流寇號一隻虎者最
黠桀寇岢嵐鳴珮設伏以計擒之羣寇駭散尋調
湖廣下湖南道五溪諸蠻畏威懷惠考績報最八
年遷戶部右侍郎尋任倉場總督十一年出為宣
大總督調任兩江時伏莽尚多鳴珮加意勦撫援
梁化鳳於偏裨中疏荐其有大將才令統水師禦
海賊於崇明後果大捷十二年賊陳其綸遙應海
寇嘯聚大柏山勦平之威名益著又為檄示海寇

諸渠帥開陳禍福偽總督張銘鎮偽總兵顧忠等
相繼降是年疏留梁化鳳守崇明尋

朝廷擢化鳳松江提督十五年海寇猝陷鎮江瓜洲攻
江寧化鳳提兵至與城中兵夾攻之大殲其衆人
咸思鳴珮知人之明尋以疾卒江南人思其德崇
祀名宦祠

祝世昌遼東人隸鑲紅旗漢軍初授遊擊天聰五
年從征大凌河六年

太宗幸演武場閱兵以世昌訓練有方加

恩賞順治五年授山西巡撫時叛鎮姜瓖作亂郡縣騷動

世昌力請殄滅凡理餉數十萬民不見擾事平又
請豁逋賦七百萬石省徭十餘萬丁七年卒於官

詔贈兵部右侍郎

賜祭葬謚僖靖方世昌之沒也百姓巷哭後巡撫劉宏遇

博採輿論謂死忠死事其義一也並請祀忠烈祠

今改祀名宦

李翔鳳隸鑲紅旗漢軍初名起鳳幼通書史

太宗時直內秘書院

賜名翔鳳順治元年隨入關定燕京授山東濟南道撫綏
有方時流賊趙應元竊據青州所至蹂躪翔鳳以
計擒之復青州得上賞二年擢江西巡撫時偽巡
撫盧某等尚據南昌等五府翔鳳至悉行勦除濱
江餘寇亦皆蕩平尋卒贈兵部右侍郎祀江西名
宦祠

李茂芳遼東人隸鑲紅旗漢軍初以職管丁壯善於撫輯天聰九年考察特加錄叙崇德五年從圍錦州擊敗明松山兵七年復圍錦州攻呂翁山臺克之兼敗其援兵復擊杏山西臺敵兵及塔山兵皆論功一等授佐領世職任戶部理事官累加世職一等輕車都尉子顯孝康熙中從征福建歿于王事

楊茂勲遼陽人隸鑲紅旗漢軍父麒祥驍勇多力

太宗時來歸任都統屢從征討有功茂勲于順治七年授太僕寺理事官十四年陞吏部右侍郎十七年授湖廣巡撫十八年擢貴州總督遣兵勦平金筑土司王應兆等及定番都勻各苗寨康熙五年授河道總督堵塞黃河烟墩決口議叙加太子少保七年堵築桃源黃家嘴決口十五年授鄖陽巡撫勦叛鎮譚宏楊來嘉等多斬馘十八年調四川總督仍駐鄖陽時吳三桂偽總督王公良率偽將軍王

鳳岐劉之衛等據夔州十九年茂勲統兵由楚江
峽路逆流而上破巫山帆風直進不二日抵夔城
兵及未交羣賊宵遁旋以哈占為川陝總督茂勲
管四川提督事隨大軍進征雲南賊平還京三十
二年卒

王登聯奉天人隸鑲紅旗漢軍順治六年知河南
鄭州巡撫吳景道薦其有德有材擢山東濟南道
十七年授保定巡撫十八年裁順天巡撫以登聯

兼理其事登聯撫保定時以海宇初定伏莽尚多
官吏艱於捕緝共相容隱請嚴縱盜之法重窩主
之律厚捕首之賞由是盜賊得息尋以圈換旗地
事擾民密疏請令各安舊業忤輔臣鰲拜意與摠
督朱昌祚同論死時論哀之八年追復原官

賜祭葬謚愍愍祀直隸名宦

于成龍奉天人隸鑲紅旗漢軍康熙初知江寧府
時總督永寧于成龍剛正清介於屬吏少許可獨

獎成龍才由通州牧題守江寧興利除弊知無不
為是時徐州有奸民某走京師以左道惑衆上告
事下制府檄江寧鎮江兩府會鞠成龍力白寃狀
制府疑故縱詰責甚厲成龍持之愈力奸民卒坐
誣又瀕江蘆洲多為豪強隱佔成龍以有課而無
洲者為冊江立予豁除有洲而無課者為欺隱陞
課而薄其罰人皆服其平允二十五年巡撫直隸
政治嚴明貴近有犯必繩以法事有不便於民者

悉除之任邱縣水荒地數千頃民產已去尚徵其糧至是奏請悉行豁免遷河南總兵去三十七年復以總督管直隸巡撫事民間其來無不歡踴尋又調河南總督去成龍所至有聲與前永寧于成龍並著人稱大小于公以別之

韓昌先遼東人隸鑲紅旗漢軍順治初任浙之蕭山令蒞事明敏政寬刑簡立理甲均當法使徭役均而詭寄之弊絕至今踵行之昌先卒於官蕭山

民建祠祀之

王國棟鐵嶺人隸鑲紅旗漢軍順治七年知山西沁州時叛鎮姜瓖亂後州境荒蕪國棟勘得無主荒地及沒水地若干請題免逋賦七千餘兩而荒地以次墾闢賦仍無缺公私便之仍隨事講求以利民為急務招徠安集民困始蘇卒祀名宦

熊維傑鉄嶺人隸鑲紅旗漢軍順治八年為浙江按察使性峭直不苟言笑然善於撫民其為政簡

而周剛而不刻時滿洲兵初移駐或有不遵約束
出擾民者有司不敢問維傑出有來訴者必立馬
更為之申理兵不敢復擾民望見其前麾輒相慶
賀

蘇宏謨遼陽人隸鑲紅旗漢軍順治中任長沙府
同知時湖南甫定兵民雜處互相猜忌宏謨加意
撫戢遇事示以坦白兵不敢肆縱民咸安其業政
理人和擢貴州糧驛道值滇省大軍凱旋供億紛

繁宏謨游及有餘毫無支詘先是差役有以人代馬謂之夾馬夫派累閭閻民甚苦之宏謨悉為革除民力以甦卒祀貴州名宦

徐鳳鳴奉天人隸鑲紅旗漢軍順治八年知江西進賢縣壬辰冬土寇來犯城鳳鳴率衆與戰矢集其面氣益奮手殺數十人賊懼引去十一年改知河南邙縣招集河朔流民給牛種墾荒田創立鴻宅保以居之躬修廩索聽訟明允邑人歌誦不衰

擢廣東儋州牧去邾民思其德康熙五十年入祀
名宦

佟國璽撫順人隸鑲紅旗漢軍知河南輝縣以崇
學校勸農桑為務有貧民不能開墾者給以牛種
勸令復業邑遭水患五閘衝決國璽親督修築使
水歸故道稻田之利復興

趙世安奉天人隸鑲紅旗漢軍康熙二十七年任
福建興化同知嚴毅有幹畧釐剔政蠹無微不燭

尤嚴禁賭博凡樗蒲之戲有犯必懲其輕者罰鍰入公為修木蘭陂之用事集工成吏民咸深畏愛王登魁廣寧人隸鑲紅旗漢軍康熙二十八年知河南汝州值秦晉歲飢疫癘盛行飛蝗蔽天饑民流入中州登魁率衆捕蝗開倉賑貸全活甚衆先是魯山賊王二等倡亂揭竿嘯聚登魁率民兵殲其渠餘黨悉平三十一年運楚米賑關中運員經理不善所至騷動登魁措置有方民無擾累其聽

訟果敏胥吏不敢稍有欺隱嗣以薦舉去部民遮
道攀留沒後猶思其澤四十九年入祀河南名宦
張至隆奉天人隸鑲紅旗漢軍康熙三十二年知
粵之肇慶府郡當牂牁下流歲三四月西流暴漲
豐樂長圍一決其害更甚至隆蒞任親駕小舟相
度經營躬先負土日夜督率築堤鞏固而水患頓
息黃江厥稅胥吏多奸蠹橫索至隆悉裁抑之商
民立碑記焉

崔懋遼陽人隸鑲紅旗漢軍康熙中知直隸新城縣時水旱頻仍民多逋逃懋力請蠲赦懇荒捐給牛種召募耕種民皆樂其故業又值小清河泛溢頗為邑患懋修築堤堰經理貲費毫不取之民間復修濬孝婦河以利民田居職十二年政簡刑清老幼咸德之尋擢冀州牧卒祀名宦

武宏祖奉天人隸鑲紅旗漢軍康熙三十一年知河南歸德府屬邑催科多陋規相沿貽患閭閻宏

祖之任悉為革除嚴禁牙帖胥吏苛取稅銀痛繩以法境治清肅吏畏民懷卒祀歸德名宦

李國亮海城人隸鑲紅旗漢軍康熙三十五年由河南布政使陞任巡撫首務教化建修書院延名宿以訓課士子嚴飭武備禁除一切陋規河工夫役柳梢俱出官辦不以累民時稱賢大吏云

欽定盛京通志卷七十九

欽定四庫全書

欽定盛京通志卷八十

國朝人物

十六

正藍旗漢軍

鑲藍旗漢軍

欽定四庫全書

欽定盛京通志卷八十

國朝人物

十六

正藍旗漢軍

佟養性隸正藍旗漢軍世居撫順為商販以貲雄
一方養性有識量能役服其鄉人天命初密輸款
于我為明所覺置之獄潛出來歸妻以宗女

賜號西屋裏額駙六年從克遼陽爵二等子時漢人歸附

者日衆以養性充總兵官統之天聰五年

太宗命督造紅衣礮鐫曰天佑助威大將軍養性掌焉八月從攻大凌河以礮克一臺又從拒明總兵吳襄等援師于小凌河擊敗之復以礮克子章臺燬諸烽堠自大凌河至廣寧六年

太宗閱兵演武場養性率所轄漢軍環甲試礮嘉其軍容整肅

賜優賚有加尋卒順治十三年追謚勤惠

佟養量奉天人隸正藍旗漢軍初為佐領陞山東
總兵官都督僉事順治六年任宣大總督駐陽和
時姜瓖初平骸骨遍野斂而葬之又建報忠祠祀
一時死事諸人衛所屯田部議照內地起科養量
言邊地沙磧種遲霜早加以兵凶荒殘愈甚若援
例起科勢必聞風俱潰疏上報可雲中人至今感
之卒祀山西名宦

佟岱隸正藍旗漢軍父佟三事

太祖為副都統佟岱其第三子也初任佐領崇德三年授吏部副理事官尋兼叅領六年從圍錦州城中兵出戰擊敗之追至城壕而還明兵夜襲我營與副都統金維城麾衆力戰明兵乃遁七年從鄭親王濟爾哈朗攻克塔山杏山旁近諸臺堡是年擢漢軍都統八年從鄭親王攻寧遠拔前屯衛及中後所三城叙功授騎都尉世職順治元年偕都統葉臣勦賊將陳永福於太原以礮克其城二年從英

親王阿濟格西剿李自成敗賊於延安逐北至湖廣獲其船於富池口英親王既班師與降將金聲桓留駐九江分遣兵徇南康南昌建昌撫州袁州諸府請宥所俘故明諸王朱慈等

詔從之

特命慈等朝闕下不以俘禮三年還京授兵部左侍郎時明桂王由榔據武岡州分置偽官踞湖南諸郡邑是年秋

命恭順王孔有德征之岱以所部兵從下湘潭趨瀘口以舟師破偽伯王朝宣於燕子窩追擒之進克寶慶夜發兵攻武岡焚其木城敗偽國公劉承允於夕陽橋遂克武岡由榔遁廣西五年凱旋六年從睿親王多爾袞討大同叛鎮姜瓖敗賊傅家嶺又與都統左夢庚連敗賊復渾源州及左衛朔州汾州太谷諸城先後叙功並三遇

恩詔晉世職至一等輕車都尉兼一雲騎尉累遷戶部吏

部侍郎十一年擢閩浙總督十二年海賊鄭成功陷舟山十三年復陷台州

詔佟岱解任還京佟岱不即行且上疏自叙勦撫功

上責其冒功戀祿以李率泰代岱俾核其事具報率泰以佟岱駐杭州不一至海濱貽悞封疆入奏遂降世職為三等輕車都尉康熙二年卒

劉宏遇遼東人隸正藍旗漢軍天命七年與其弟奇遇來歸崇德初授內院副理事官順治元年為

工部理事官二年由山西朔州道擢陝西布政使
四年考績稱最擢安徽巡撫勦賊渠王貳甫等及
英山霍山潛山諸賊皆平之七年授山西巡撫時
姜瓖初平村聚多蹂躪逋賦巨萬宏遇疏請得豁
免又恤諸死事家建忠烈祠祀之九年旱饑遣使
分賑全活甚衆汾流侵會城築隄障之既去民懷
其德建祠祀焉今祀山西名宦

李率泰隸正藍旗漢軍父永芳初為明撫順遊擊

天命三年以城降累晉爵至三等子率泰初名延齡年十二入侍

內廷

太祖賜以今名比長以宗女妻之

太宗征察哈爾朝鮮及圍錦州率泰俱從崇德八年從征至山東有勞績洵擢副都統順治元年授刑部叅政既定官制改侍郎從入關破流賊李自成招撫天津平山東滿家洞賊功最二年從豫親王多鐸

破流賊於潼關移師南下克揚州薄南京分兵徇
定蘇州松江諸郡邑攻克江陰三年從貝勒博洛
平浙江福建叙功授世職為二等輕車都尉考滿
兼一雲騎尉五年海賊鄭彩犯福州漳州泉州諸
郡

詔率泰興靖南將軍辰泰往勦先後擒斬賊渠曾慶顧世
臣等俘其衆數萬連復長樂連江興化彩引潰衆
竄入海江西賊郭天才乘間自杉關掠福州聞率

泰偵備嚴夜焚洪山橋以遁閩地寇患稍息巡按御史周世科虐刑攫賄率泰疏劾之斬世科發賊私巨萬民皆感泣六年從討大同叛鎮姜瓖下保德州擒斬賊黨牛化麟等八年遷吏部侍郎授弘文院大學士六年坐與同官辰泰誤增

恩詔赦條罷任降世職為騎都尉九年

特旨晉三等男十年以大學士洪承疇薦擢為兩廣總督時兩廣方有李定國之患定國者流賊張獻忠遺

黨獻忠死降于明桂王朱由榔奉由榔據安隆盡陷粵西郡縣土賊廖蔣增等應之勢張甚十一年率泰至粵遣兵殄蔣增于玉版巢十二年定國來犯新會諸縣率泰督兵禦之敗其將高文盛會靖南將軍珠瑪喇率禁旅至合兵夾擊大破之新會城下乘勝復高州雷州諸郡所至軫恤民賴以安十三年加太子太保調閩浙總督時彩已前死其族弟成功者偽國公芝龍子也大軍平福建時芝

龍東身歸命而成功竄金門招集亡命嘯聚海濱
數犯福建浙江廣東諸郡縣至是時出剽掠往來
海上無常率泰既蒞任請增設水師三千增置哨
船數百為戰禦計請以撫佐勦翦其羽黨並言
成功父芝龍不宜徙寧古塔恐其地近海或因間
遁歸闕為患滋大

聖祖悉是其言以前破李定國功晉一等男考滿加太保
率泰以次招撫賊黨陳德容唐邦杰林朮葉祿等

所降不下數萬而賊勢顧未衰十五年成功犯溫
州府平陽瑞安俱陷浙東告警率泰請調江寧駐
防兵助勦賊退泊舟山是年

詔分置浙江總督以都統趙國祚任之俾駐溫州而以率
泰專督福建駐福州未幾賊踞南安嶺窺福州賊
黨陳斌降復叛率千餘人據羅星塔為成功援率
泰馳檄會師焚其巨船千餘賊遁走斌孤窮乞降
誅之福州城南十六年坐訊屬吏獄不竟奪爵任

總督如故康熙初率泰以漳州為全閩門戶復請
增設水師二千尋會靖南王耿繼茂擊走定海小
埕諸賊又會提督馬得功擊走萬安所賊楊宣是
年成功竄死臺灣孽子錦稱偽世子拒命其黨已
稍離於是率泰招降林俊奇陳輝何義魏明等三
百餘人兵二千有奇而閩地山賊復起遂統建寧
延平邵武三路兵進勦縛其渠王鐵佛山賊平已
而錦與其黨周全斌擁衆內犯分遣總兵王進功

參將折光秋夾擊之自率舟師偕繼茂擣廈門取
浯嶼金門二島錦全斌大敗去遂勦滅寧化山賊
降偽總兵林國樑進兵八尺門降偽將軍翁求多
夜半渡海拔銅山縱火焚賊巢斬首三千三百餘
級俘偽侯黃廷等以下三萬餘人錦僅以數十艘
遁入臺灣論功加秩正一品蓋三年五月事也九
月遣兵勦南山鎮海佛潭橋餘賊十月遣兵勦茶
子畚山賊俘斬無算八閩內地悉平五年卒于官

卹贈兵部尚書

賜祭葬謚忠襄明年追贈一等男于正宗襲

李延壽一名剛阿泰額駙李永芳第三子也少負
將才早歲從征平定南方郡縣以功加都督順治
五年任宣府總兵時大同叛鎮姜瓖作亂雲中千
里響應人心搖動而五臺受圍尤急延壽伺知賊
穴在賓村聲言代州養馬刻期進兵即從峨口出
賊不意夜抵賓村自據真武廟遣勇士數人馳馬

耀甲於街賊衆驚潰乃縱兵圍勦賊黨聞之解五
臺圍延壽分兵勦捕且招撫安民有黠賊據曹巖
砦拒守砦高數百丈四面陡絕延壽督兵環圍之
斷其上下途徑夜半絙綴援手而登直造砦門鳴
鼓奮攻賊驚潰俱墜崖死遂入邑城曉諭四鄉俾
各還本業延壽居官二載旌別淑慝優禮士庶亂
後勸墾荒田給牛具人人有更生之慶卒崇祀山
西名宦

巴顏李永芳第五子也天聰八年襲父爵為三等子崇德六年任叅領從征科爾沁有功大軍圍錦州明總督洪承疇以兵十三萬來援駐松山城下巴顏從擊之大破其軍七年擢都統八年九月從鄭親王濟爾哈朗拔中後所前屯衛二城順治元年晉二等子偕都統石廷柱勦土寇于昌平尋偕都統葉臣徇直隸饒陽河南懷慶山西澤州潞安諸郡邑皆下之二年帥左翼兵與右翼都統李國

翰會大將軍和洛會于陝西進勦四川三年流寇
孫守法賀珍等犯西安巴顏興和洛會夾擊之殲
其衆殆盡珍等收餘燼列陣山巔巴顏登山奮擊
賊驚竄追敗之濠泗河搜勦黑水峪斬守法降其
衆二千進勦流寇二隻虎于商州斬萬餘級復偕
副將王平等擊延安諸路賊敗之張果老厓攻克
其巢馘其渠獲馬贏無算五年晉一等子從討大
同叛鎮姜瓖明年攻復渾源州及大同左衛朔州

汾州太谷諸郡縣巴顏每臨城輒督左翼兵發巨礮攻之所向皆克八年晉爵至一等伯九年卒年三十有三

賜祭葬如例子釋迦保襲爵亦以功名著

李日茆遼東人

太宗時以生員入內院理事

賜人五戶隸正藍旗漢軍順治元年授永平府知府三年遷霸州兵備道授策州牧張儒秀諭降土賊李振

宇等數百人尋擢左僉都御史四年以右副都御史任操江明年降將金聲桓據南昌叛陷九江江左告警日尤督兵扼小孤山磨盤洲檄同知趙廷臣叅將汪義遊擊袁誠等迎擊之敗賊于彭澤賊不敢南犯六年裁安徽巡撫

命日尤攝其事桐城潛山太湖三縣皆阻山有余尚鑑者以擁立明宗室朱統騎為名糾聲桓餘黨踞山為巢結寨二十餘勢張甚日尤遣副將梁大用等攻

克皖澗寨斷其水道分兵四面蹴之連拔飛旗桃
園等寨斬統騎尚鑑三縣悉平十年勦徽州赤嶺
賊斬其渠張惟良十一年偽安西侯張名振犯鎮
江瓜州截刼漕艘日克于鎮江城外檀家洲植椿
編筏環以鍊索列礮大江南北岸南岸自鎮江玉
圖山北岸自瓜州至三江口並築新堤架木橋以
通巡徼分遣哨船更番防禦名振屢為哨卒所敗
乃遁入海日克以勞績累加兵部尚書太子太保

十二年卒謚忠敏

李時芳隸正藍旗漢軍天聰四年從征有功崇德
七年隨圍錦州明兵來犯以二十人禦之復擊呂
翁山兵敗之七年隨克塔山杏山遷佐領八年復
克中後所前屯衛有功順治元年隨平山西克太
原等府還授戶部理事官三年隨破流寇賀珍等
於西安珍奔武功復追敗之又同破流寇于商州
還授都察院理事官五年隨征山東土寇復曹州

累加世職至三等輕車都尉十年隨平湖南敗偽秦王孫可望於全路口擢駐防鎮江叅領康熙七
年授福建興化等處總兵官十一年乞休卒

劉伸金隸正藍旗漢軍崇德五年隨圍錦州擊敗
松山杏山兵復追敵至錦州城敗之六年從擊明
呂翁山兵有功七年隨拔塔山杏山八年隨征黑
龍江部多俘獲得優賞復隨克中後所前屯衛順
治元年加佐領世職任戶部理事官尋隨征山西

流寇獲其戰艦五年考滿稱職擢兵部左侍郎六年隨討叛鎮姜瓖于大同復渾源汾州等處七年擢山東臨清等處總兵叙功加世職二等輕車都尉兼一雲騎尉十年調福建右路總兵尋卒

張朝璘隸正藍旗漢軍父士彥明廣寧守備為巡撫王化貞中軍化貞遁入關士彥來降授三等輕車都尉朝璘襲職崇德七年以佐領從攻登州八年從克中後所前屯衛二城晉世職為二等任兵

部理事官順治二年從豫親王多鐸下江南攻克揚州城駐防蘇州擊敗明總兵黃蜚等軍蜚復擁千艘來犯朝璘以舟師迎戰春申浦大敗之四年從恭順王孔有德征明桂王朱由榔于武岡乘夜疾進遇明將曹志建軍擲火毬焚其營志建軍潰復敗偽國公劉承允于夕陽橋承允乃以武岡降由榔走靖州朝璘轉戰黔陽破偽伯張先壁所部五營進克沅州六年從睿親王多爾袞討叛鎮姜

環於大同復渾源左衛及朔州汾州太谷等城厯
官副都統晉爵至一等男累遷戶部侍郎尋奉

命巡撫江西時南昌瑞州二府經金聲桓之亂戶口凋耗
田多荒落巡按御史宣重光請蠲賦興甿下朝璘
議具言二府荒田六十餘萬畝自召墾以來新甿
雲集成熟者四十萬畝墾者尚二十餘萬若一概
徵科必將以荒田之賦飛寄熟田新甿若賦重勢
且委之他徙則不特荒者終荒漸至熟者亦荒應

如重光言蠲之便得

旨報可十五年加兵部尚書十八年擢江西總督康熙二
年右布政使王庭請減南昌府屬賦額復下朝璘
議朝璘博考江西諸府縣志知南昌袁瑞三府橫
徵之弊自陳友諒始友諒以武寧乃其鄉縣故縣
賦獨如宋元舊額而他皆倍之明沿其弊未革前
撫臣蔡士英按臣吳贊元欲革其弊而是時府縣
新定舊志散亡僅據右布政使莊應會所得故牘

奏減袁瑞二府賦額未及南昌今庭請減之誠恤
民至計疏入遂減六縣一州歲徵銀十九萬五千
餘兩米十四萬九千餘石民甚德之四年裁江西
總督乃還京五年復出為福建總督六年以老疾
致仕越十餘年卒子聖鐸襲職

佟國印隸正藍旗漢軍養正從孫也父恒年從養
正守鎮江城天命六年中軍陳良策叛降明養正
恒年皆被執不屈死國印襲職為騎都尉崇德三

年授工部副理事官六年圍錦州偕都統石廷柱
擊敗呂翁山步卒復從圍明總督洪承疇於松山
明兵有逸入高橋南山臺者攻克殲之十年以礮
擊杏山塔山城並下之遷工部理事官從入黃崖
口屢敗明兵克邊臺十七又敗明牆子嶺守兵八年
從攻寧遠克中後所城進敗前屯衛國印以巨礮
擊其城返火傷其領創甚攻益力卒克之順治元
年從入關叙功晉二等輕車都尉三年擢工部右

侍郎六年任都察院叅政前後論功復三遇

恩詔晉爵至三等男十二年以疾致仕康熙十一年卒

賜祭葬如例子世德襲世德于康熙時征叛鎮王輔臣于

平涼五戰皆捷亦屢著有軍功

陳錦錦州人隸正藍旗漢軍天聰五年來歸授騎

都尉順治元年由內院副理事官授登萊巡撫值

州土賊楊威秦尚行結連明總兵劉澤清聚衆為

亂錦遣兵進剿擒威等斬以徇二年賊渠張廣焚

掠掖灘諸邑錦遣兵擊敗之廣復聚衆寇平度州
萊州錦分檄登萊諸將授計設伏進擊追賊至徐
疇伏發射殪廣盡殲其衆尋擢操江總督與招撫
大學士洪承疇並駐江寧誅城中叛黨擊偽瑞昌
王朱誼泐敗之尋調浙閩總督勦海賊鄭成功破
其將軍寨五年六年屢敗海賊鄭彩之衆復福清
等二十餘縣七年疏陳進勦舟山機宜明年由定
關進兵敗賊于璜洋擒偽侯阮進等攻舟山破之

九年與海寇鄭成功戰江東橋失利次同安夜宿帳中為賊所刺卒追贈兵部尚書

賜祭葬如例

佟學文隸正藍旗漢軍初任佐領崇德五年

太宗親征明錦州學文率兵奮勇攻其城東北諸臺堡皆克之七年隨克中後所前屯衛有功順治八年任本旗叅領九年累加世職三等輕車都尉十一年擢直隸宣化等處總兵尋卒

佟國器奉天人隸正藍旗漢軍順治二年任嘉湖
兵備道勦撫浙西餘寇撫集瘡痍進浙江按察使
時浙江初定叛獄繁多國器平情讞鞫釋枉矜疑
全活無算八年任福建布政使十年擢本省巡撫
閩自明季戶口散失吏胥那移作奸里民大困國
器履畝受糧積困乃甦至征剿海寇飛芻輓粟刻
期猝辦又累疏陳請撥給淮浙鹽餉協濟軍食簡
選將士剿殺賊首劉希亮等招撫安插山寇悉平

閩人至今頌其功十二年巡撫南贛剿賊曾拱辰
據興國之梅窖坑剽掠吉贛二郡國器遣將討平
之長寧黃鄉賊楊興再叛據大帽山國器殲其渠
魁招安餘衆又平寧化白扇坑三村黃素禾諸盜
由是江廣閩楚之賊畧盡先是贛州漕米輸南昌
而贛鎮兵食又自南昌撥運舟行灘險人病轉輸
國器疏留贛漕以給鎮兵即以南昌饋贛之米抵
漕兵民兩便時重兵宿贛日久議興屯田佐軍食

國器曰政責因地制宜屯於贛無益遂罷之調撫
兩浙熟悉瀕海情形招降偽都督廖明旗勦海賊
阮六等海疆寧謐卒祀江西浙江名宦

佟國鼐奉天人隸正藍旗漢軍順治三年隨大軍
入閩平定全省遂任巡撫招流亡安反側遠近懷
服四年海寇鄭彩等犯福州國鼐率衆擊敗之賊
遁去戊子歲饑土賊糾衆圍城時大軍進討兩廣
留守不滿千人國鼐伏兵近郊擒斬渠魁王細君

等又令副將王進田勝等勦捕餘寇閩南諸境以
安時巡按周世科專用酷刑每一獄常延蔓數十
家國鼎濟以寬仁多所全活閩人歸心焉卒祀名
宦

陳維新遼陽人隸正藍旗漢軍順治四年任昌平
兵備道時渤海盜起株連州境維新力為昭雪民
賴保全尋擢浙江右布政使州民為立生祠十年
巡撫廣西僞晉王李定國犯桂林維新悉力拒守

賊驅象衝小西門入維新亟令將士投木石塞門
奪其象賊復穴城西地道實硝黃其中欲轟城維
新令掘城內深丈餘戒兵士持火箭併囊土伺穿
穴將近即射箭入穴藥發城崩賊多壓死囊土者
出土急築須臾成城賊氣沮悉遁去事平念粵境
屢罹兵火請蠲十年及十一年租賦以甦民困民
甚德之卒祀廣西名宦

田昇龍奉天人隸正藍旗漢軍順治十四年巡按

廣西疏陳粵民窮困狀凡鹽埠營債諸弊立請革除旗弁有強佔民產并奪子女者力為禁止又請改省城舊藩邸為貢院

國朝粵西賓興自此始

張朝珍廣寧人隸正藍旗漢軍初任工部啓心郎順治十八年巡撫安徽凡所陳奏皆切中利弊康熙十二年任湖北巡撫時大軍進勦滇黔軍務旁午朝珍不遑寢食造戰船以練水師建浮橋以渡

兵馬運糧抵蜀不派民夫歲饑捐賑全活甚衆在
楚數年招流亡安舊業絕餽遺禁火耗政有實惠
嗣以勞瘁卒於官祀湖廣名宦

佟鳳彩遼陽人隸正藍旗漢軍順治初由香河知
縣屢擢至江西布政使十七年巡撫四川疏請修
復都江大堰民田普被其利康熙六年調黔疏言
驛站舖兵及徵糧各事宜俱報可十一年巡撫河
南兼理河道疏請修築河工人夫盡出官催不費

民力得

旨允行時逆藩吳三桂叛豫省為進剿通衢鳳彩於軍行
供需遑迅無滯力請罷民間協濟輓輸草豆之役
民甚德之十六年卒于官

賜祭葬謚勤僖祀河南貴州名宦

張鳳儀錦州人隸正藍旗漢軍初知江西廣信府
當兵燹之後實心撫循大軍入閩取道廣信等畫
供應不以煩民順治四年分巡嶺北叛鎮金聲桓

圍贛與巡撫劉武元總兵胡有陞竭力守禦城中糧匱諸將或言老弱徒糜軍食不若殺之并食固守鳳儀正色曰諸君欲反耶凡守土以為民也王者之師攻城猶不敢妄殺况守城而屠我民乎武元是其言未幾援至一郡獲全

李成龍奉天人隸正藍旗漢軍初任涿州知州厯任直隸巡道勤于理事聽斷案牘不留再宿鳩工治河勻派里甲民無怨言而事集擢山東布政使

安慶巡撫湖廣總督皆有惠政致仕卒祀直隸名宦

張朝瑞廣寧人隸正藍旗漢軍順治五年知河南登封今年少英毅洞悉民隱邑經兵燹土曠民稀招徠流亡多方勸墾凋殘頓蘇以循能擢御史巡按湖北瀕行父老追送百餘里莅楚後清節益著屬吏皆敬憚之

梁繼祖隸正藍旗漢軍世居義州康熙元年知五

臺縣以敦教化厚風俗為務奸宄革面豪強屏肅
嶢巖匪盜之數悉皆解散廣立義學貧乏皆教育
其中建養濟院存活窮獨鰥寡惠政以次舉行擢
江南六安牧再遷平陽守卒五臺士民思其德崇
祀名宦

喻成龍奉天人隸正藍旗漢軍康熙二十六年知江西臨江府時漕米解戶多累率至破產成龍令悉領於官百姓便之尤鼓舞士林振興學校購經

籍數千卷置尊經閣以授學者生平所表章忠孝節義為多

佟國弼奉天人隸正藍旗漢軍康熙三十九年知江南徐州值歲饑力請蠲賑出常平倉麥貸饑民明年又饑國弼代為償之河北數遭水患乃築子堰數十里歲得有秋卒後徐民懷之祀名宦

張聖佐遼陽人隸正藍旗漢軍康熙四十三年任四川松茂道先是打箭爐蠻作亂官兵進剿誅戮

數千人積骸盈野聖佐巡邊至其地悉取枯骨埋之居官尤多惠政以愛民為首務後擢至河南巡撫松潘人思其德崇祀四川名宦

鑲藍旗漢軍

申朝紀遼東人隸鑲藍旗漢軍天聰八年任刑部啟心郎崇德元年

賜諸臣人戶牲畜準其績之上下第為四等朝紀得

優賜順治元年授河南河北道駐懷慶流賊二萬餘來犯

殪其渠乘白馬者賊黨悉竄去二年擢江南布政使再擢山西巡撫懲明季驛遞之弊乃請裕經費杜監支毋計糧養馬毋按畝役夫勒石申禁以祛民累又請定賦役全書俾有司不得私徵苛斂並下部議行時陽城土賊王希堯賈國昌等寧鄉逆民楊春暢等先後以左道倡亂悉捕誅之汾州叛卒李本清任自興據永寧銅柱寨四出剽掠督兵破其寨擒本清自興寘諸法部內以寧擢宣大山

西總督五年卒于官祀山西名宦

劉光弼遼陽人隸鑲藍旗漢軍天聰五年任耀州
城守尉從圍大凌河城攻克其旁近三臺明監軍
叅議張春總兵吳襄等來援陣斬其裨將崇德五
年任叅領從圍錦州攻克呂翁山諸臺屢敗松山
杏山援兵錦州既下復以礮攻克塔山杏山兩城
及附近臺堡七年擢副都統八年從攻寧遠取前
屯衛中後所二城順治元年從入關擊敗流賊李

自成偕都統葉臣等征山西攻克太原三年隨端
重親王博洛征浙江拔金華進定福建五年授禮
部侍郎隨大將軍譚泰討江西叛鎮金聲桓復南
昌遂留署江西提督事六年平廣昌賊招降偽官
三十餘人旋

予寔授是時境內賊蠭起多稱明偽官負山為寇時出劫
掠光弼遣其部將張自盛洪國玉追勦于湖東大
敗之偽總兵董明魁郭永旻等率衆降論功並遇

恩詔晉世職至一等輕車都尉十六年以老疾致仕康熙

十二年卒

賜祭葬如例子顯保襲

尚可喜遼東人初為明廣鹿島副將航海來歸授
總兵官從征宣化代州俘獲甚衆崇德元年封智
順王明年從克皮島七年請以所部隸漢軍遂為
漢軍鑲藍旗人八年從克中後所前屯衛二城順
治元年從入關追擊流賊李自成至望都斬其將

谷可成尋從英親王阿濟格道塞上自榆林趨綏德追勦自成兄子錦于延安會豫親王多鐸已破潼關定西安可喜遂與英親王追勦自成於湖北別將兵徇下鄖陽荊州襄陽諸郡降偽將王光恩苗時化等復合大軍連敗賊東下九江自成走死九宮山乃班師還鎮海城自成死錦與其黨郝搖旗王進才等擁衆數十萬走長沙常德降于明桂王朱由榔分據湖南郡邑三年可喜偕恭順王孔

有德懷順王耿仲明往征之連敗錦進才于岳州
長沙進取桂陽擊走搖旗於道州分兵克衡州寶
慶武岡諸州郡湖南底定五年凱旋會提督李成
棟以廣東叛附由榔六年成棟敗死信豐而由榔
諸偽官猶分據廣東諸郡乃改封可喜平南王統
師征之進克南雄斬其將楊傑等三十餘人七年
克韶州清遠降其將蘇利吳六奇師次廣州成棟
子元允與偽總督杜永和偽國公陳邦傳偽伯馬

寶等屢以衆拒戰並擊敗之復以間招降偽總兵
郝尚久黃應傑於潮州惠州於是廣州勢漸孤而
州城三面阻水守者於城外密布礮臺引水繞之
三匝猝不可攻又其地炎蒸多雨弓矢解膠久相
持未下可喜乃檄江西諸路兵會勦既至潛遣人
夜決礮臺下水令軍士藉薪徑渡奪礮臺以礮擊
城西北隅城圯軍士畢登斬守將范承恩城中兵
皆潰追殺潰衆至海濱溺死無算元允竄肇慶永

和等竄瓊州奏捷得

吉嘉獎八年遣總兵許爾顯徐成功攻克肇慶羅定高雷
諸州郡永和亦以瓊州降廣東悉平而流賊張獻
忠遣其黨李定國據滇黔以附由榔寇掠廣西九
年連陷桂林梧州南康平樂潯州橫州東犯北州
吳川可喜遣兵赴援定國引去十一年定國復東
犯高州雷州廉州薄肇慶可喜統兵至三水聞定
國轉攻新會密授計將士設伏沿江要隘自率精

銳攻定國營定國敗遁伏兵起擊之斬馘過半又遣副都統畢里克圖等追勦至橫州所陷郡邑悉復可喜遂留守廣東廣東寇亂初定而土賊間作遙結閩賊鄭成功為沿海郡邑患可喜檄兵勦賊渠鄧耀于海康勦蕭國隆洪彪周祥等于恩平開平陽春陽江耀走交趾國隆投水死彪祥等悉就擒斬之蓋順治十七年事也

聖祖即位

詔遷沿海民于內地番禺蜚戶周王者自稱恢粵將軍煽沿海民為亂所至焚掠可喜遣兵擒之康熙三年總兵蘇利以碣石叛躬率兵迎戰海豐陣斬利復碣石衛城十二年疏請歸老遼東方下所司議適逆藩吳三桂以雲南叛

詔留鎮如故三桂以逆書誘可喜可喜執其使送京師十三年逆藩耿精忠以福建叛廣西將軍孫延齡以桂林叛可喜獲延齡檄有三藩並變語乃上疏自

白並請發師協勦

詔慰諭之

命江西兵助可喜殲賊尋潮州總兵劉進忠叛附精忠可
喜令次子之孝討之十四年加封可喜親王授之
孝平南大將軍是時簡親王喇布統師出江西為
三桂精忠所阻未得達粵粵東土賊乘間竊發可
喜檄兵勦之屢捷進忠亦屢敗求援精忠不能應
乃以潮州附成功子錦錦遣賊萬餘助戰勢猖甚

叛鎮祖澤清復踞高州引其黨連陷雷州廉州及
德慶開建電白諸邑可喜連章告急

詔趣簡親王速進兵迄未得達明年可喜以寇氛方熾不
即撲滅積憂成疾日益篤而三桂驅賊逼肇慶誘
其長子之信從逆可喜卧疾弗能制憤甚自縊左
右救之甦遂不起及疾革曰我死必返葬海城魂
魄有知猶可給役

先帝左右遂服

太宗所賜衣而卒年七十有三明年之信悔罪自歸迎大

軍入粵

敕議可喜卹典謚曰敬二十年之孝奉其喪歸葬海城

聖祖以可喜忠誠無二

遣內大臣往祭立碑墓道

李國翰隸鑲藍旗漢軍副將繼學子也襲父三等

男世職任侍衛

賜號墨爾根天聰三年攻永平有斬獲五年克大凌河九

年以善撫降者加二等男世職崇德三年任刑部
理事官入邊敗吳三桂軍克濟南還破獲鹿四年
進副都統五年圍錦州六年戰松山塔山並在事
有功叙功加一等男世職擢都統八年克前屯衛
及中後所加世職三等子順治元年入關擊敗流
賊李自成國翰進征山西畧饒陽與賊帥掃地王
遇一戰斬之進援汾陽太原山西既平進征湖廣
敗賊于武昌二年征四川破叛鎮賀珍之衆又敗

流寇于延安滅流賊張獻忠於西充駐防漢中叙
功加一等予世職六年率兵征階州進克蒲城勦
宜川清澗餘寇更著勇畧七年拔府谷九年

詔加世職二等伯進征四川破賊合州拔重慶降劉文秀
克嘉定州川境畧平遂鎮保寧擊斬賊帥王復臣
等十年以功進封三等侯十五年進攻遵義破李
定國軍遂克開州招四川土司諸酋咸遵約法十
七年卒于軍贈太子太保謚敏壯雍正三年入祀

賢良祠並

命于侯爵三次襲滿時仍襲三等伯乾隆十五年加伯號

曰懋烈子桑額海爾圖俱知名

巴泰姓金氏隸鑲藍旗漢軍天聰五年任二等待衛從圍大凌河城明兵自錦州趨授侍衛尼雅漢迎戰中創墮馬巴泰馳入陣援之出六年從征大同多斬馘崇德九年從戰沙河楊村三屯營並有功六年從攻錦州敗明總督洪承疇軍比斂兵還

營已泰為殿敵自後躡之將及巴泰還戰面中流
矢戰益力揮刃斬其驍將一敵乃卻

太宗嘉其善戰授雲騎尉世職尋擢一等侍衛順治二年
晉世職為騎都尉尋遇

恩詔加一雲騎尉以不阿睿親王削世職

世祖親政復之晉二等輕車都尉十五年進散秩大臣遷
內大臣康熙三年擢國史院大學士晉爵三等男
六年充纂修

世祖實錄總裁官時鰲拜輔政惡已泰不附已既構陷同
官蘇克薩哈集衆定讞慮已泰異議屏不與聞七
年以疾解職八年鰲拜獲罪起秘書院大學士仍
充

實錄總裁官九年改中和殿大學士兼吏部尚書晉爵一
等子十一年

實錄成加太子太傅十六年七月以老致仕

賜以所御冠服十九年復起為都統二十三年固請解職

命以內大臣與朝請二十九年卒

賜祭葬謚文恪子蘇赫襲

朱延慶隸鑲藍旗漢軍繼父任叅領延慶兼通滿

漢文在文館辦事天聰八年十二月

太宗詔羣臣各抒所見延慶疏陳時政並薦陳極新申朝

紀

太宗可其奏皆擢用之順治二年平定江南授兩淮鹽法

道尋轉浙江嘉湖道時浙省兵燹之餘草澤尚多

伏莽延慶招徠撫循多惠政五年擢江西巡撫疏
革加派免羨餘絕株連招集流亡修造漕艘十年
卒浙江人思其德崇祀名宦幼子萬壽仕至廣西
梧州守有政聲

高鳴鐘隸鑲藍旗漢軍初任佐領崇德三年隨征
明有功八年從攻克明前屯衛中後所順治元年
隨平山西克太原復擊敗流賊餘兵三年從征湖
廣五年從征大同叛鎮姜瓖皆有戰功累加世職

二等輕車都尉官江南提督子永運于康熙十三年以從征逆藩吳三桂戰沒于長沙

周召南遼陽人隸鑲藍旗漢軍順治八年知山西汾州府時寇亂初定一以招徠綏輯為務而武斷舞文為民害者懲治不少貸下令屬邑徭賦有當均當豁者悉申請慈祥愷悌屬謁憲司為民請命民甚德之

張學聖奉天人隸鑲藍旗漢軍順治中知江南徽

州府與徽寧道張文衡總兵張天祿皆輯兵愛民
深得人心後皆遷擢去時有挽不住三張弓之謠
今祀徽州名宦

馬之先奉天人隸鑲藍旗漢軍順治九年以右副
都御史巡撫陝西治尚簡靜不事紛更十四年晉
兵部尚書總制三邊之先練邊事開屯田訓士伍
皆有法卒於官秦民為罷市

賜祭葬謚勤僖陝人思其德請祀名宦

王業興奉天人隸鑲藍旗漢軍順治中知江南廬
州府勤敏節儉頗著清操值海氛肆虐逼境業興
率家丁及營卒登陴捍禦屢挫賊鋒州得無事在
郡十三年勸課農桑減省刑獄民咸德之

李天浴奉天人隸鑲藍旗漢軍歷官郎中順治六
年

詔廷臣條陳規取滇黔事宜天浴力主三路進兵後果如
所策奏功康熙七年任雲南巡撫廉明勤慎屬吏

凜然無犯法者時吳三桂奏請徙滇民天浴力疏
止之尋以父憂去起為山東巡撫卒於官

許嗣興開原人隸鑲藍旗漢軍康熙十一年知山
西蒲州操守廉潔葺廟學復河中書院嚴立課程
文風蔚起徵收錢糧勸諭有法豪猾為民害者密
加防緝重法究懲羣匪斂迹閭閻晏如時有檄民
運糧西安之役嗣興請寬民力運至陝界而止十
三年逆藩吳三桂反川陝煽亂大軍所過居民震

動蒲尤衝衢嗣興彈壓安輯客兵過境者無敢肆
民賴以安累擢湖廣按察使遇事執法不撓有長
壽寺妖僧石瀟者以邪術傾動一時又交通安南
國王得其餽贈僭侈踰分嗣興惡其惑衆因事拘
訊重杖遣戍士論快之嗣擢福建巡撫卒後蒲人
思之不諼雍正元年紀本州名宦

甯維邦奉天人隸鑲藍旗漢軍康熙二十一年授
江西德化知縣行次潛山聞征滇回師將過九江

維邦疾馳赴任軍士有射殺人者走匿舟中維邦
廉得之請置於法徇諸通市自是過者皆肅然秋
毫無犯先是征糧責成里長奸滑乘機侵蝕弊端
日滋維邦勒碑永禁民困始甦



欽定盛京通志卷八十